

CANTIC NEVEZ

(18)

*Composet var Buez an Abostol Sant Pêr ,
Princ an Ebestel.*

Var ton : *Guerz Sant Alexis,*

CLÈVIT cana eur Vuez zo nevez compost,
Grêt da Brinç an Ebestel , Sant Pêr e zê hanvet ,
Pehini zo enoret e pêvar c'horn ar bed :
Nep a glêvo e c'hana a vezo ravisset.

Brêma me a zisclêryo d'ar bed oll en antier
Ar Vuez , ar Miraclou eus an Autrou Sant Pêr ;
Penos en deus recevet alc'hoes ar Barados ,
Evit cass ar Gristenien eun deiz d'y da repos .

Sant Pêr , Abostol , a voa natif a C'halilee ,
Hac a voa pesqetaer , hervez m'eo e Vue ;
E vreur a voa Sant Andre ; hor Zalver er galvas ;
Ha ma quittas e vicher da heuill ar Messias .

Bet en deveus ar pouvoar eus a zorn ar Messi
D'amari ar pec'hejou , ha d'o disamari ;
Ar Vêleyen abaoe iveauz o deus-y bet :
Nep na heulio ar Zant-mâ , biqen na vo salvet .

Lêzomp ar privilachou pere en deveus bet
An Abostol beniguet digant Salver ar bed ;
Canomp brêmâ an daêlou pere en deus scuillet ,
P'en devoa e Vestr Jesus e tal an tân nac'het .

D'an nos eus ar Yaou-Gamblit, Jesus en deus laret
E vije abandonet dre' vrassa mignonet;
Sant Pér a zavas diouz tol, hac a lavar neuze :
Me ho heulio, va Mestr quer, bete coll va bue.

Jesus a respont da Bér, ractal ma er c'hlèvas :
Aroc ma cano ar c'hoq, te am nac'ho, siouas !
Partia ra hor Zalver d'ar Jardin Olivet,
Da offr d'e Dad Eternel e Bassion galet.

Dont a ra ar zoudardet evit e guemeret ;
Jndas' deu d'e drahissa ; Sant Pér en deus troc'het
Ar scoùarn deo da Valchus etouez ar zoudardet,
Abalamour ma vele e Vestr quer goal-drêtet.

Laqat a reas Jesus ar scoùarn en e blaç ;
O tistrei ouz Pér neuze, truezus e laras :
Ar muntr a zo difennet ; ho cleze dastumet :
Nep a scoyo gant cleze, gant cleze vo lazet.

Pa en devoe hor Zalver lavaret qémentse,
E saillas an dud barbar neuze souden varne,
D'en amari gant querden evel eur sorcer bras,
Ha treinet dre ar vouullen da bales Caïphas.

Pér, o heulia hor Zalver, a velan zo spontet,
Pa vel e voa qemeret gant an dud arrajet ;
Heulia a ra hor Zalver da bales Caïphas,
Hac én monet da domma, an amzer voa yen bras.

Eur vatez euz ar pales er güelas o tomma,
Ha prest en anavezas, ma c'houlennas ountâ ;
Te a zo eur c'hamarad demeus ar fals Prophet,
Pehini zo en nos-mâ er jardin qemeret.

O lachete effroyabl eus an Abostol-màn !
Lavarat a ra penos n'anav qet anezân !
Proferi a ra teir güech e vlasphem milliguet ;
Ebars ar memes instant ar c'hoq en deus canet.

Er memes amzer, Jesus en déveus bet sellet
Oc'h e Abostol Sant Pêr, ha dezàn lavaret :
Pêr? gant da gomizou, siouas! eo va c'halon rannet;
Goas eguet va zourmanchou abers ar zoudardet.

Onnes eo ar bromessa a poa-e dîn-me grêt
Penos betec ar maro e pije va heuillet?
Te zo porsier an Envou, hac ec'h eus va zromplet!
Sorti buan, den ingrat! da vouela da bec'het.

Sant Pêr, pa en deus clêvet comzou Salver ar bed,
E galon a zo rannet, hac e zeo sortiet
D'ober epad e vuez eur binigen galet :
Prestit hoc'h attantion, m'ho ped, asistantet :

Gant bara zec'h ha louzou, ha dour par a eve,
An douar yen da gousqet en devoa da vele :
Hervez m'en deus rapportet an Autrou Sant Gregoar,
Pa glêve cana ar c'hoq, e vouele gant glac'har.

Goude ma voe bet pignet hor Zalver bars en èe,
Ec'h assamblas en eur gambr an Disqibien neuze,
Evit choas un Abostol ebars e plaç Judas,
Pini voa êt gant Satan en ifern d'an tân bras.

D'ar Pantecost, pa deuas dê ar Speret-Santel,
Sant Pêr a voe ar c'henta o prezeg an Aviel,
Maro hor Zalver, hac e convertis en un de
E tuont pêvar mil den ebars en eur c'hontre.

Sant Pêr a voe ar c'henta oc'h ober miraclou,
O tiscleria'n Aviel a Jesus hon Autrou ;
Tud hac a voa possedet gant Satan milliguet,
Evel ma touche outo, e vijent delivret.

Cass a reas dirazàn calz a dud afflijet,
Re glân ha paralitiq, hac ive leproset ;
Ar squeud demeus a Sant Pêr, el lec'h ma tremene,
A roe d'an oll yec'het dre ar c'hraç a Zoue.

Gant conje an Ebestel eo souden partiet
Da vont da guær Samari gant San Yan beniguet,
Da gass ar Speret-Santel d'ar Gristenien neve,
Hac evit o c'honfirma muioc'h en graç Doue.

Er guær a Jerusalem e zoa bet prisonniet
Gant ar Roue Herodes, eun den cruel meurbet,
Carguet eus a chadennou e dreid hac e zaouarn,
Eus e boanniou e c'hoardou a rë bouzard scouarn.

Nos-deiz e zoa an Ilis ebars en oréson,
O pedi evit Sant Pêr, pini zo er prison,
Ma pliche gant hor Zalver ma vije delivret
Eus e zaouarn Herodes, a voa cruel meurbet.

Sant Pêr bars en e brison a zo chommet cousqet;
Un Ael guenn a zo deuet en deus e zifunet :
Me zo deut abers ho Mestr evit ho telivra;
Guisqit buan ho tillad ha va heuillit bremâ.

Tremen eure ar goardou hep beza tam güelet,
Ar persier eus ar prison o-unan digoret;
Rentet e voe gant an Ael er gambr gant miracl bras,
Da gaout an Ebestel all, a voa glac'haret bras.

Satan o velet penos ez eo bet chasseet
Eus a douez ar Gristenien gant ar Groas beniguet,
En deus digasset eur monstr demeus e gonsortet,
Simon ar Magicien eo au den milliguet.

Emà a voa eur sorcer, a lare' voa Doue,
Dre ardou fall an diaoul sorceres bras a rë;
Sant Pêr, evel ma clévas, da Rom e partias
Gant Sant Marc, Avieler, a voa e vignon bras.

Bremâ Simon ar Sorcer a ra troyou plêsant;
Dirac an Impalaer en em chench en serpent;
Laqat ar mein en bara, ha moni e creiz an tâo,
Hep caout na drouc nac offanç, dre c'hraç e vestr Satan

Digueri rē'n dorojou pere vije serret,
Delivra prisonnerrien a vije chadennet.
E Rom en deus alumet eun tān voa qer puissant,
Ma sōnjet e voa dēvet qær oll en un instant.

Mes Sant Pēr, pa er güelas, a yas da gomz ountān,
Ha dirac an Impalaer a lavaras dezān :
Ret eo dīn digass eun den a vezo decedet ;
An hini en ressuscito a vo Doue credet.

Var eur blacen eus a Rom voe eun theatr savet
Evit güelet ar miracl a dleye beza grēt ;
Ha dre urz an Impalaer eur c'horf voe digasset ,
Pehini aboe tri mis a voa bet entéret.

Simon ar Magicien a gommenças qenta ;
Ar maro a zao e benn , an diaoul eo emā ,
Ar bobl oll e general a gommanç lavaret
Penos voa Simon Doue ha Souveren ar bed.

An Abostol beniguet a voa var e zaoulin ,
Hac a bede a galon Jesus , hor Mestr divin ;
Larat a ra d'ar maro , demeus a bers Doue ,
Sevel buan en e za ha retorn en bue.

An den-mā neuze souden en e za zo savet :
Hac ar bobl oll a grias : Doue ra vo meulet !
Goude , Simon ar Sorcer , gant Satan possedet ,
A voe gant an diaoulou ac'hano anlevet.

Savet e voe qen huel gant an drouc-sperejou ,
Ma cuezas var an theatr , bruzunet e vemprou ;
Mes an Impalaer Neroa , den barbar ha brutal ,
A ras Prisonnia Sant Pēr neuze souden rac̄jal .

Dastumet e voe gantān iveau an Ebrestel ,
Ha laqet en eur c'hachot eguis tud criminel ;
Chadennet e voent ive en eur fēçon brutal ,
Ha laqet calz soudardet evit dont d'o dioüal .

Gant an instructionou eus an Abostolet,
Ar goardou a voa lajet nos ha deiz d'o miret
A zo bet convertisset da lezen hor Zalver,
Ar jolier, ar jolierez, o famill en antier.

Da rei dezo badiziant banne dour n'o d'oa qet,
Mes Doue a zisquelas miracl en o andret :
Eus ar roc'h e sortias eur feunteun ar gaera,
A ra bepreat miraclou bete'n heur a vremâ.

An Impalaer Neron, den cruel, milliguet,
Ar Brincet eus e bales en deus bet assamblet,
Da invanti tourmantchou eus ar re gruella,
Da dourmantin Ebrestel voa prisonniet gantâ.

Sant Pêr demeus ar prison a zo bet sortiet,
Pedet gant an Ebrestel gant comzou calonec :
Pardon, hor Princ, emezo, a vremâ ni ho ped
D'hon recommandi en oll d'hor Mestr bras beniguet.

Eur pennad demeus a Rom Sant Pêr en deus cavet
E Vestr quer carantezus : Jesus a Nazaret
Hac ar Zant pa er güelas, a c'houennas ountâ :
Livirit din, va mestr quer, pelec'h e zit bremâ.

Jesus en deus consolet e Abostol santel
Gant comzou carantezus, douç ha celestiel :
Pelec'h e zan da vont, Pêr, e'houi oc'h eus goulenet ?
Mont a ran bremâ da Rom da veza crucifiet.

Sant Pêr evel ma clêvas comzou Salver ar bed,
A douetas e voa én a vije crucifiet.
Retorn a ras d'ar prison, mes gant eur galon vad,
Da scuilla evit Jesus ar rest demeus e voad.

Sant Pêr ebars er prison pa zeo bet éruet,
Ancourach ar Gristenien, pere zo dezolet :
Souffromp gant paciantet, va breudeur, ar maro,
Hac e viimp recompanct gaut Jesus en énvou.

Casset d'an Impalaer , d'ar maro eo barnet ;
Sant Paol , evel Romanist , a vezò dibennet ,
Ha Sant Pér , evel Yuzeo , a vo crucifiet ,
Hac e dreid hac e zaouarn gant tachou vo staguet.

An Impalaer cruel en deveus ordrenet
Ma vije an dud santel dirazàn divisqet ,
Ha staguet oc'h pillierou evit beza fouettet ,
Qen a deuje da scuiza ar bourrevien tygret.

Adieu , va c'hamaradet , a lavar Pér da Bol ;
Diganeoc'h e c'houlennàñ pardon ha gant an oll .
En em boqomp oll bremà an eil hac eguile ,
Qent ma vezimp separet evit coll hor bue.

E humilite zantel a reas da Sant Pér
Goulen ma vije staguet er groas vel hor Zalver ;
Gant calz a humilite en deveus goulennet
Ma vije e benn d'an traòn dezàn crucifiet.

Neuze' bars er Vatican , pe Menez Aour hanvet ,
E voe cunduet ar Zant gant calz a zoudardet ;
Laqet voe e benn d'an traòn ha tachet ouz ar groas ;
Ma crie misericord an oll , bian ha bras.

Sant Pér zo victorius , hac a rent e ene
Etre daouarn e Vestr mad , Jesus , güir Vab Doue.
An tosta eo d'hon Zalver ebars er Barados ;
Protectour eo d'an Ijis evidomp deiz ha nos.

Ar c'horf santel a Zant Pér a zo bet ambomet
Dre soign eur bêleg santel , Marcel e zeo hanvet ;
Ha laqet ebars eur bez precius bras meurbet ,
Peur-dost d'al leac'h ma voe ar Zant crucifiet.

An Abostol qer Sant Pér en devoa pemp troatad ,
Douç , humbl , paciant , modest , mes eus a figur vad ,
E zaoulagad voa tener , rac meurbet e vouele ,
Abalamour m'en devoa nac'het güir Vab Doue.

Cetu eta, Christenien, Buez Autrou Sant Pêr,
Mellezour deomp, pec'herien, ebars e peb amzer;
Da vouela ar pec'hejou hon eus bet coumetet,
Hac e vezimp eveltan gant Jesus pardonet.

An Abostol bras Sant Pêr dre oll a zo pedet
Ebars en oll Paressiou, e pêvar c'horn ar bed;
Gantâ e mât an alc'hoez demeus ar Barados :
Pedomp-én ta a galon ma zaimp dy da repos.

FIN.



E Montroulez, e ty LÉDAN, ru Pont-an-Itron-Varia.